

雞澤縣志卷之十七

蕭山王錦林粵巖增輯

靜海牛思永 校訂

列女

詩首閔睢鵲巢應之夫夫婦婦王化基於此矣邛郯
為變風之始而皆首柏舟一著莊姜貞操一表共姜
烈志蓋淫靡俗尚立節為難自劉向傳列女後世志
來因之雞故衛地二姜聞範宜有彤管流輝者夫心
堅匪石而志為靡它所稱巾幗完人足以風世而勵

俗詎非王化所關耶志列女

明

王氏趙伯讓妻讓卒氏年二十三孝奉舅姑撫二孤成立
姪亨妻李氏年二十亦寡茹苦守節有以他適勸者以
死自誓俱年九十餘卒建雙節坊旌表

劉氏孟宗妻年十八夫亡家貧甚氏勤紡織操井臼以孝
養舅姑撫遺腹子成立建坊旌表

韓氏庠生郭濂妻平鄉歲貢韓果女年十九適濂甫六月
濂卒氏茹苦孝事舅姑撫遺腹子娶婦生孫既而子復

不壽抱幼孫都郊自教之皆成立遊庠氏曉文字知禮
義閭範嚴肅雖兒稚見之不敢啼笑年八十九卒巡按
樊猷科姜繼曾表其門

張氏經歷張琴女適庠生王法年十八而寡奉舅姑盡孝
撫遺孤先民教養備至貢入太學年七十餘卒巡按樊
猷科姜繼曾表其門

梁氏庠生何澤妻澤卒氏年十九毀面素服不踰閭閻雖
鄰里戚屬罕見其面勤於女工舅姑安其孝養年八十
餘卒知縣于慧扁其門曰貞節

金氏陳三妻年二十二夫亡遺腹生子舅姑欲奪其志氏聞縊於寢室家人驚覺救活同孀嫂沙氏孝養舅姑守節以終建坊旌表

史氏王諒妻年十九歸諒數月而寡撫遺腹子紡績自給殯葬舅姑皆能盡禮年八十有四巡按王應吉表其門郭氏王相妻年二十四夫亡撫前室子守深如己出娶媳韓氏年十七亦寡遺子世祿姑婦同撫之成立遊庠守節終身縣尹以雙節旌之

聶氏王尚古妻年十九夫亡兄嫂欲嫁之氏不從詣夫墓

自縊於樹幾絕家人覺急趨救得免守節終身不變

弓氏吉仲和妻年二十三和卒守節至八十歲院道旌表

趙氏王登妻年二十夫亡孝事舅姑撫育幼子後子卒舅姑俱逝守節不變郡縣表其門

王氏何炳妻炳卒遺子三讓甫三歲氏誓以死殉親鄰苦勸勉從之三讓成立娶賈氏年十八生一子可奪三讓復亡賈堅志與姑共守撫子至成立仕黃縣縣丞建雙節坊旌表

殷氏趙炯妻年十六適炯炯抱病三載氏奉湯藥如一日

及炯卒遺孤未週撫之成立娶媳生孫子又亡氏復撫之甘貧守志以歿孫元勲遊郡庠知縣李時俊表其門曰節可維風

劉氏梁可則妻夫早亡矢志守節萬厯年間建坊旌表

賈氏田九齡妻贈同知賈棲鳳女年二十二夫亡氏觸樞

幾死勺水不入口者六日鄰人以事姑撫幼大義勸之

遂毀容紡績不出門庭雖至親罕見其面後子家祥入

武庠孫夢熊為諸生巡按宋師襄表其門曰貞烈

魏氏柴基妻年十九夫亡生子未週氏荼苦自給上事孀

姑下撫孤子守節五十餘年巡按錢桓表其門曰節凜
冰霜

許氏庠生何講妻年二十夫亡姑患乳癰氏朝夕進藥餌
口吮之數年始愈課子守節四十年卒孫淵深為諸生
趙氏王鎬妻鎬卒家貧甚撫子三槐守節漸致富勤儉不
異貧時知縣王用予表其門曰凌霜節操

高氏張民服妻夫亡守節五十四年遇歲荒幾餓死終不
易志知縣趙思明表其門

王氏陳喜妻夫亡事舅姑撫幼子艱苦備嘗誓不改適至

八十二歲卒知縣曹大章給扁旌之

劉氏于銳妻銳早卒氏欲以身殉姑嫂勸其撫孤以繼血
嗣遂堅志自守教子士美為藩府贊禮鄉閭稱之

郭氏庠生趙一信妻年二十二夫亡家貧無子蓬首垢面
朝夕哭泣終身無笑容茹苦五十年而卒

趙氏劉尚朋妻朋卒遺孤三歲家貧無親值苦雨閉戶僵
臥數日不舉烟火鄰人聞兒啼聲怪之排闥入氏已將
絕救甦衆餽食復不受知縣張素裕聞其賢為立貞節
坊月給錢養之仍親詣其門氏終不肯出戶惟俯伏致

謝而已氏守節終身無一日免於饑寒子蕩復不壽茹苦而卒

王氏永年代府長史王三畏女適劉錫子庠生孟池氏年十九孟也暴卒盡焚其衣物以誓必死其母兄曰汝死霜姑無倚將亦死是汝節全而孝虧也氏始勉曰輕身死節易保身守節難吾為其難者因立嗣守之奉姑至孝教子志闕向學早食廩餼年七十餘而卒建坊旌表郝氏盧尚賓妻年十九夫亡氏以死自誓既而勉從翁姑命撫孤克保先業終身不衣帛食肉守節六十餘年巡

按胡繼昇給扁云柏舟雅操

柴氏生員柴拭女張世紀妻年十八夫亡遺子國士甫周歲家業伶仃饔飧不繼親鄰勸以他適氏咬指出血誓與孀姑同守勤紡績以奉薪水課子列庠應貢官訓導孫五人曾孫十一人年九十一而終人咸謂苦節之報毛氏舉人趙貺妻年十四歸貺家貧衣鶉食糲貺卒遺子方二歲氏年二十五守節撫孤操作倍異他日姑病三年不起氏奉湯藥晝夜扶持無一刻離其側者年六十七而卒子胤昌孫鑒俱遊庠

梁氏庠生郝近鳳妻年二十一夫亡家甚貧教子瑀廩於
庠享年九十七歲飲食步履無異壯年郡縣給扁旌之
賈氏庠生田承志妻年十六適承志三年而寡無子遺一
女甫周歲氏欲以身殉三日不食貧姑諭曰汝死此女
必不育何面目見汝夫於地下乎氏乃勉食終身不如
黨晝夜操作冰霜之節歷久彌堅年六十餘卒以無後
且貧未請旌表公論惜之

李氏武秋妻少寡言笑不苟操若冰霜苦節終身知縣任
民望表其門

焦氏田學書妻年二十一夫亡家甚貧翁姑年老遺孤遠
淳甫三歲氏茹苦績紡遭歲荒終日不舉火父母欲奪
其志氏痛哭以死自誓卒能終養翁姑課子遊庠鄉里
咸稱其節孝云

郭氏金世祿妻年二十五夫亡遺孤甫歲餘氏矢志守節
不出閨門持家有道教子國璽遊庠藩府聞其節旌之
李氏田蘊璽妻遇變蘊璽兄弟被殺氏抱女同嫂王氏抱
男潛走王尼創難行令李速逃李曰良人兄弟俱死當
存此子以留田氏後遂棄己女抱其子越城而去得無

姜妯娌孀居事舅姑以孝聞又同邑李氏適曲周郭棠
戊寅之亂舉家逃匿翁姑旋被殺氏攜幼男并夫之七
歲幼弟同走力罷不能俱全或教之捨叔而抱子氏曰
翁姑死矣叔豈能再得吾夫在外或未死子尚可望也
竟棄子抱叔而去明史合載雞澤二李氏

李氏宋鉞妻年十九夫亡遺孤方二歲舅姑欲奪其志百
端挫辱氏斷髮誓不他適年九十餘卒

趙氏王柰妻少寡誓死守節以終

周氏庠生武元祥妻早寡艱貞守志事姑甚孝姑病禱於

神顧以身代病遂愈課子肖佳讀書食廩餼復早夭氏
苦節如初巡按周堪賡表其門曰冰霜高節

陳氏生員陳唐女歸張璠一載生子映奎十四日璠卒氏
絕粒八日不死姑泣勸其撫孤乃勉食後嫂逼之改嫁
氏誓不從紡績奉姑育子守節四十餘年知縣表其門
郝女郝崇女年五歲父卒及笄以母無壯子誓不嫁日事
紡織供養並佐其弟姪讀書年至八十面若童顏鄉人
謂之仙姑云

楊氏顧通妻年二十一夫亡家貧無子鄰里有欲奪其節

者氏涕泣三日不食詣夫墓自經死藩府旌表樹碣於墓左

張氏王邦友妻年十九邦友卒氏誓同死嫂嚴防之越二日始嫂以炊即自縊於夫柩側知縣白起旦親為拜奠給棺木葬之巡按連標題表烈節

張氏生員張學曾女進士賈熙績仲子聚樂妻事孀姑以孝謹聞樂兄早卒遺嫂殷氏奉之如姑遇寇變不屈赴刃而死

李氏生員李化蛟女通判趙永安子瑄之妻年二十夫亡

無子誓死守志立嗣子肩撫之成立遊庠遇亂城陷投

井死

張氏陳明道妻事舅姑至孝盜劫其家以及威之至死不

少屈

趙氏照磨趙國士女舉人康爾祚妻性行端淑言笑不苟

遇城陷抗節死子庠生霖震救母不得皆爭先歿及建

坊旌表

馬氏殷應試妻嫻習閭儀事翁姑以孝妯娌無間言夫死

氏年十九無子女誓不再適偶歸寧值叛兵突至逼令

解襦欲有所索氏大哭拒之兵怒以利刃刺腹斷腸而死死後猶持衣領如拒賊狀旌表

徐氏生員徐三聘女庠生胡復澄妻克修婦道事繼姑以孝聞遇叛兵突至逼之以行氏憤怒不從自刎死

王女王之玉女年十四西山寇發遇賊強之跪女坐地不少屈兵抑其項女以頭觸石而死

王女庠生王璽女許聘永年舉人李芳濯子庠生球奕年十四遭兵亂死節裏衣千紵縫結面色如生李感其義迎葬先塋旌表知縣賈益謙以詩輓之見藝文